



Hōtaka 22 – A me te O



Ahakoa he aha te rirohanga, ka taea te whakamahi ngā kupu hāpai nei:
taku, tō, tana – mehemea kotahi anahe te rirohanga; me ngā kupu
 hāpai: **aku, ō, ana** – mehemea e rua neke atu rānei ngā rirohanga.

Ko **taku** kurī tēnei. (kararehe – ‘a’)


Ko **tō** āporo tēnei. (kai – ‘a’)

Ko **taku** whare tērā. (whare – ‘o’)

Ko **tana** pāpā tēnā. (reanga whakapapa ki runga i tōu – ‘o’)

I te ao wetewete reo e kīia ana ēnei kupu he pūriro. Kua waia koutou ki te kupu ‘pū’ mō ngā kupu hāpai, ā, kua mōhio hoki koutou e hāngai ana ēnei kupu ki ngā rirohanga, nā reira i tāpirihia ai te ‘riro’.

Ki te kore koe e tino mōhio ko tēhea te pūriro e hāngai ana ki tētehi rirohanga/taputapu/mea, me whakamahi koe i tētehi o ngā pūriro here-kore e kīia nei, he pūwātea.



Hei āwhina i a koe ki te maumahara i ngā rirohanga kei raro i te pūriro ‘A’ – whakaarohia te pikitia kei te taha mauī nei. Ko ngā wāhanga matua o te pūriro ‘A’ kei ia matimati o ‘Te Tokorima a Māui’.

K – kai; T – taputapu; M – mahi; T – tamariki/mokopuna/tāne/wahine; K – kararehe

Hei mahi

Tuhia he rerenga kōrero hei whakamārama mai i te hononga o ngā rirohanga kei raro iho nei me ngā tāngata. Whakamahia te pū ‘te’, te pū ‘ngā’ rānei ki mua i te rirohanga i roto i ō rerenga. Hei taurira:

Ko ērā ngā tōkena o Piripi.



He taurira:

1. Ko ērā ngā tōkena o Piripi.
2. Kei te whakarongo au ki te pātai a Tama.
3. E rua ngā pūtu o Piripi.
4. He pai te whakaaro o Tama.
5. He whero te tuanui o te whare o te tokorua.
6. He whero te motokā o te whānau.
7. Anei ngā kī a Mere mā.
8. Katohia ngā āporo a te hapū.